

Wakaf kesihatan bantu atasi isu kenaikan kos perubatan

Oleh Dr Siti Nadiyah Mohd Ali
bhrencana@bh.com.my



Pensyarah Kanan
Universiti
Teknologi MARA
(UiTM) Kampus
Seri Iskandar

Kenaikan kos rawatan kesihatan dan pertambahan penduduk menyebabkan kerajaan terpaksa menanggung perbelanjaan tinggi, sekali gus memberikan cabaran kepada sistem kesihatan negara untuk mencari penyelesaian seimbang antara keperluan kewangan dengan kebajikan pesakit.

Hal itu turut menjadi tumpuan dalam Kertas Putih Kesihatan termasuk cadangan mengkaji dan menyemak semula struktur fi rendah di klinik, hospital serta fasiliti berkaitan.

Pada masa sama, Kementerian Kesihatan (KKM) wajar memanfaatkan wakaf kesihatan yang dapat dilakukan melalui kerjasama dengan Yayasan Wakaf Malaysia (YWM) seperti konsep wakaf air.

Sebenarnya, YWM sudah mewujudkan Sijil Wakaf Tunai Kesihatan, iaitu kutipan daripada orang ramai akan dilaburkan, manakala pulangan manfaatnya akan digunakan untuk membiayai aktiviti kebajikan berkaitan kesihatan.

Dana wakaf dikumpul itu, akan dipindah kepada aset kekal merangkumi objektif kesihatan mengikut kesesuaian dan peraturan diguna pakai seperti membiayai pembelian alat kesihatan untuk kebajikan masyarakat, ubat-ubatan dan alatan bantuan perubatan untuk pesakit kurang berkemampuan.

Konsep wakaf kesihatan bukan hanya membabitkan wang, peralatan atau ubatan, malah ia boleh dalam bentuk kepakaran terutama oleh

pegawai perubatan.

Wakaf kepakaran ini boleh dimulakan dengan mewakafkan masa perkhidmatan kepada petugas kesihatan yang ingin menyumbang melalui skim kepakaran, sekali gus membolehkan KKM mempunyai pangkalan data berkaitan berapa banyak masa diperuntukkan pastinya bernilai jutaan ringgit.

Hakikatnya, sistem ekonomi ketiga seperti wakaf memiliki kekuatan untuk memastikan kelestarian dan kesinambungan kebajikan sosial. Ia berpotensi untuk meningkatkan akses terhadap layanan kesihatan berkualiti.

Kejayaan wakaf tunai kesihatan itu boleh dijadikan batu loncatan dalam usaha membangunkan hospital, pusat kesihatan atau fakulti perubatan wakaf, sekali gus memberi peluang kepada masyarakat kurang berkemampuan mendapatkan rawatan perubatan serta pendidikan perubatan.

Rekod kepada usaha ini sudah ada, iaitu kerjasama KKM dalam membangunkan Bangunan Wakaf Majlis Agama Islam dan Adat Istiadat Perlis (MAIPs) serta Pusat Perkhidmatan Dialisis Hospital Tuanku Fauziah.

Pusat perkhidmatan dialisis mula beroperasi sejak Ogos 2020 dengan kapasiti 69 katil dan kos pembinaan RM6.2 juta itu menggunakan konsep dana wakaf tunai, sekali gus memberi petanda positif bahawa gerakan wakaf perlu disuntik dengan kesedaran dan pengetahuan mendalam.

Manfaat kerjasama strategik

Oleh itu, kerjasama strategik antara KKM dengan YWM dan pihak berkuasa wakaf perlu diterjemah-

kan segera agar lebih ramai rakyat kurang berkemampuan akan mendapat manfaatnya.

Hakikatnya, wakaf di negara ini mengalami perkembangan signifikan dalam tempoh 20 tahun, malah sektor korporat seperti Johor Corporation (JCorp) melalui bekas Ketua Pegawai Eksekutif, Allahyarham Tan Sri Ali Hashim banyak menabur bakti dalam wakaf kesihatan khususnya di Johor melalui Klinik Wakaf An-Nur.

Antara keunikan klinik itu, ia memberikan rawatan kesihatan secara meluas kepada semua tanpa memandang latar belakang sosial, agama atau etnik apabila tetap mengutamakan kualiti walaupun mengenakan pembiayaan rendah, bahkan memberikan rawatan secara percuma kepada pesakit tidak berkemampuan.

Apapun, usaha menggerakkan Skim Wakaf Tunai Kesihatan perlu dibuat secara berstruktur dan strategi terutama bagi mendapat serta membina keyakinan rakyat untuk terbabit secara langsung.

Ini termasuk memberikan kesedaran dan kefahaman kepada masyarakat mengenai konsep wakaf tunai kesihatan ini melalui kempen penerangan di media massa, penulisan bercetak serta program pendidikan.

Penjelasan mengenai manfaat wakaf kesihatan dan kaedah pelaksanaan perlu dibuat secara terperinci termasuk mewujudkan poster menarik melalui infografik yang positif secara jelas dan mudah difahami.

Hakikatnya, kita mahu wakaf kesihatan ini menjadi landasan untuk kita menciptakan perubahan bererti dalam masyarakat dengan memberikan kekayaan kesihatan baik, berkualiti dan lestari.